

Setia, PDC bangun 141.64 hektar tanah di Setia Fontaines

PETALING JAYA: SP Setia (Setia) menandatangani memorandum kerjasama (MoC) dengan Perbadanan Pembangunan Pulau Pinang (PDC) untuk bersama-sama membangunkan kira-kira 141.64 hektar tanah di Setia Fontaines menjadi pembangunan bercampur atau perindustrian.

Menurut kenyataannya, kerjasama ini menandakan satu peristiwa penting dalam usaha Setia untuk memulakan kawasan perindustrian yang berpotensi untuk pembangunan Setia di Pulau Pinang.

Dengan rekod prestasi terbukti PDC dalam mengubah Pulau Pinang menjadi wilayah perindustrian yang berkembang maju, perkongsian ini tepat pada masanya dan penting dalam mempercepatkan pertumbuhan.

Presiden dan Ketua Pegawai Eksekutif Setia, Datuk Choong Kai Wai berkata, pihaknya sangat teruja untuk bekerjasama dengan PDC yang telah memainkan peranan penting dalam kejayaan industri Pulau Pinang.

Katanya, perkongsian ini akan mempercepatkan per-

tumbuhan dan meningkatkan strategi tanah perindustrian serantaunya.

“Dengan tumpuan kami untuk membangunkan taman perindustrian bertema hijau, termasuk Setia Alaman di Shah Alam dan Setia Tanjung Kupang di Johor, kami yakin inisiatif ini akan menyumbang dengan ketara kepada pertumbuhan jualan dan keuntungan kami.

“Pembangunan estet perindustrian ini akan mewujudkan asas yang kukuh, memanfaatkan permintaan tinggi dalam sektor hartanah perindustrian untuk memastikan nilai dan pertumbuhan yang berkekalan disuntik ke dalam Setia REIT pada masa hadapan,” katanya.

Setia Fontaines, sebuah perbandaran mega seluas 684.32 hektar yang terletak di tengah-tengah Seberang Perai Utara, sedang dalam proses pengezonan semula kira-kira 141.64 hektar daripada jumlah pembangunan sebagai sebahagian daripada strategi Setia yang lebih luas untuk mengembangkan portfolio taman perindustrian bertema hijau.